

## NIVUL O STELL?

Pensavum in la vita  
da vess cumè chi stell  
ca brilavan sicür  
in d'un ciel inscì bell.

Sevum dumà nivul  
che in diversi mument  
andavan, vegnevan  
ai caprizzi dul vent.

E savevum che 'n di  
sota 'n ciel propi scür  
sa finiva da viv  
sa finiva da cur.

Ma intant ca sa va  
quanti rop da scuprì:  
praa, fiur, stell,mar, muntagn  
hinn lì anca par ti.

E chi öcc pien d'amur  
ca ta guardan andà  
ca ta disan sott vuus  
quantu ben gh'è da fà.

L'è vera sem mia stell  
dumà nivul ca vann  
ma ca lassan un segn  
par tütt ul ben ca fann.